

01/06/2000

Persembahan amal Al Jarreau

YAYASAN Orkestra Muda Malaysia (MYOF) akan menganjurkan persembahan amal, An Evening With Al Jarreau di Dewan Merdeka, Pusat Dagangan Dunia Putra (PWTC), Kuala Lumpur pada 18 Jun ini.

Persembahan selama 90 minit yang bermula jam 8.30 malam itu adalah sebahagian kegiatan bagi meningkatkan kutipan tabungan MYOF.

Pengerusinya, Mirzan Mahathir, berkata hasil sumbangan dan kutipan jualan tiket konsert itu akan disalurkan untuk membantu kegiatan remaja terutamanya pelajar yayasan itu.

"Kami mengharapkan sumbangan sekitar RM200,000 hingga RM300,000. Namun, itu bergantung kepada sokongan masyarakat. Ia amat diperlukan untuk menggerakkan aktiviti MYOF yang terjejas akibat kegawatan ekonomi dua tahun lalu.

"Dengan sumbangan berkenaan, segala cabaran dan impian MYOF diharapkan menjadi kenyataan," katanya dalam sidang media di ibu negara, kelmarin. Turut hadir, Pengarah MYOF, Dr Shafiq Abdullah.

MYOF ialah satu organisasi yang ditubuhkan untuk membantu perkembangan remaja menerusi muzik sebagai perantara bahasa sejagat. Penubuhannya dianggap sebagai inisiatif membantu menangani gejala sosial di kalangan remaja masa kini, selain berperanan membentuk suasana yang menyumbang kepada pembangunan dan penghargaan muzik orkestra.

"Secara tidak langsung MYOF menyuburkan minat masyarakat agar lebih menghargai muzik. Malah, ia menjadi laluan bagi mengesan bakat muda untuk dibimbing ke arah lebih positif dan kreatif," katanya.

Al Jarreau akan menyampaikan rangkaian lagu yang melonjak namanya di arena nyanyian antarabangsa termasuk dari album terbaru yang akan berada di pasaran tempatan tidak lama lagi.

"Al Jarreau adalah contoh terbaik remaja yang terpaksa menempuh jalan berliku selain bergelut dengan kesusahan sebelum mencipta kejayaan. Dia juga menjadi sumber motivasi dan kreativiti.

"Seni lagu dan muzik dihasilkan dengan penuh ketelitian, membuktikan dia ikhlas dengan perjuangan untuk memberikan hanya yang terbaik. Aspek seni yang dibawa menggambarkan semangatnya kental untuk mencipta kecemerlangan. Ciri yang dimilikinya patut dicontohi remaja," katanya.

Tempahan tiket boleh hubungi Ticket Express Hotline di talian 03-40454455 atau emel: tesb@po.jaring.my. Ia mula dijual hari ini.

(END)